

中國方志叢書·華中地方·第七六七號

據

清·彭際盛等修，胡宗元等纂
清光緒元年刻本

影印

江西省

吉水縣志

(八)

成文出版社有限公司印行

吉水縣志卷之五十五

藝文志

文集

序

易傳序

楊萬里

易者何也易之爲言變也易者聖人通變之書也何謂變
蓋陰陽太極之變也人與萬物五行之變也萬事人與萬
物之變也古初以迄於今萬事之變未已也其作也一得
一失而其究也一治一亂聖人有憂焉於是幽觀其通而
逆繪其圖易之所以作也易之爲言變也易者聖人通變

之書也其窮理盡性其正心修身其齊家治國其處顯其
僚窮其居常其通變其參天地合鬼神萬事之變方來而
變通之道先立變在彼變在此得其道者蚩而哲愚可淑
青可福危可安亂可治致身聖賢而濟世泰和猶反手也
斯道何道也中正而已矣惟中爲能中天下之不中惟正
爲能正天下之不正中正立而萬事通此二帝三王之聖
治孔子顏孟之聖學也後世或以事物之變爲不足以搜
吾心舉而捐之於空虛者是亂天下者也不然以爲不足
以遁吾術挈而持之以權譎者是愈亂天下者也然而學
者將欲通變於何求通曰道於何求道曰中於何求中曰

正於何求正曰易於何求易曰心愚老矣嘗試於二三子
講之二三子以爲愚之言乎非也愚聞諸先儒先儒聞諸
三聖三聖聞諸天淳熙戊申八月二日楊某序

四書章旨通旨序

羅大經

孔子賢於堯舜何賢於堯舜以六經之作也朱子賢於周
程何賢於周程以四書之述也六經管攝衆理四書發揮
六經培三才之根底壽萬古之氣脈赫赫明明淵淵浩浩
盛矣哉廬陵有碩儒曰實軒先生李君幼蘊氣醕而行方
心潛而志慤視四書若衾裘飲食手鈔口講晝誦夜思所
謂造次必於是須臾不可離者也沈涵之久綱領愈明探

三ノ月三ノ日
二
討之深、節目畢露、提挈維絡、融會貫徹、於是乎作通旨條
分、縷析句研、字辨於是乎作章旨、歷年滋久、始克成書、蓋
亦盡心焉耳、然則四書固有功於六經、而通旨章旨又豈
不有功於四書也哉、嗚呼、斯道之在兩間、如陽精之在天
也、日月升而光彩常新、猶水泉之在地也、人人汲而清甘
不竭、夫子以一貫語、曾子抽關啟鑰、無餘蘊矣、而曾子復
有忠恕之說焉、程子復有維天之命於穆不已、乾道變化
各正性命之說焉、易書詩禮拈出敬之一字、開示學者入
道之門、至深切矣、而伊川復有主一之說焉、上蔡復有常
惺惺之說焉、放利喻利之戒、夫子箴萬世之膏肓、如秋霜

夏日之嚴且烈矣而孟子復有穿窬之譬焉南軒復有有所爲而爲之皆人欲而非天理之說焉蓋自道理之明而呈露者觀之無言而四時行百物生者天也無行而不與二三子共之者夫子也雖寂不容聲可矣自道學之精深詳密者言之則咀之而其味無窮索之而其理無盡講之而其義無極前聖後賢繼繼承承所以不容已於著書者誠非可已而不已也然則李君之書又可以屋下架屋牀上疊牀議之也哉李君視大經有二十餘年之長居同鄉且同出辟雍李君不以大經爲少且愚間嘗謂之曰吾於四書得四言焉曰中庸閑博大學密察論語教人主於克

治變化孟子教人先以體認推廣此四言者子以爲如何
大經悚然敬其言且妄贊之曰克治變化則密察之功全
體認推廣則閎博之體著譬之織文經緯錯綜爛然成章
而一絲一縷各有條理不相侵紊李君撫掌曰得之矣通
旨章旨之不可闕一者正如是矣李君天資宏毅惟己之
爲守居官介然弗諂弗隨欽崎厯落不展厥施繇是益得
以大肆其力於四書蓋通旨章旨脫稿未踰年而李君歿
雖其間實定刪潤未竟其志者尙多有之而大綱細目固
已燦然畢陳矣嗚呼其亦幸而成此書也其亦不幸而不
用此書也李君之冢嗣從大力學趾美詞藝蔚然以大經

於是書之作概嘗有聞屬爲之序慨念疇昔不鄙切磋之意齋宿執筆而不敢辭

指南錄自序

文天祥

予自吳門被命入衛守獨松關乃王正二月除浙西大制撫領神皋予辭并引帳兵二千人詣行在日夕贊陳樞使宜中謀遷三宮分二王於閩廣元夕後予所部兵皆聚於富陽朝廷擬除予江東西廣東西制置大使兼廣東經略知廣州湖南策應大使未及出命陳樞使已去國十九日太皇除予右丞相兼樞密使都督諸路軍馬時北兵駐高亭山距修門三十里是日北帥卽引董參政以兵屯樅水

教場城中兵將官紛紛自往納降予欲召富陽兵入城已
不及事三宮九廟百萬生靈立有魚肉之憂會使轍交馳
北約當國相見諸執政侍從聚於吳左丞相府不知計所
從出交贊予一行國事至此予不得愛身且意北尙可以
口舌動也廿一日至高亭山謁北帥前後失信帥辭屈且
謂決不動三宮九廟決不擾京城百姓留予營中旣而呂
師孟來予數罵其叔姪愈不放還賈餘慶者逢迎賈國乘
風旨使代予位於是北兵入城所以誤吾國陷吾民者講
行無虛日北知賣國非予所容也相戒勿令文丞相知未
幾賈餘慶吳堅謝堂家鉉翁劉岳皆以府第爲祈請使詣

北方蓋空我朝廷北將甘心焉二月八日諸使登舟忽托人遣館伴逼予同往予被逼脅欲卽引決又念未死以前無非報國之日姑隱忍就船方在京時富陽兵已退趨婺處等州予俟間還軍苦不自脫至是欲從道途謀遁亦不可得至京口留旬日始得鹽商小舟於二月晦夜走眞州朔日守苗再成相見論時事慷慨流涕予致書兩淮間合兵興復苗贊之甚力初三日早制司人來乃出文書謂丞相爲賺城欲不利於我苗不以爲然送予出門勸奔淮西予謂此北反間也否則託辭以逐客也李公仁人使見予必感動遂之維揚苗遣五十兵四騎從行夜抵西門欲待

旦求見呵衛嚴密鼓角悲慘杜架閣謂李公必不可見徒
爲矢石所陷不如渡海歸從王室予然之自是日夜奔南
出入北衝犯萬死道途苦難不可勝述嗚呼予之得至淮
也使予與兩淮合北人懸軍深入犯兵家大忌可以計擒
江南一舉而遂定也天時不齊人事好乖一夫頓困不足
道而國事不競哀哉予至通聞二王建元帥府於永嘉陳
樞使與張少保世傑方以李郭之事爲己任狼狽憔悴之
餘喜不自制跋涉鯨波將躡屩以從意者天之所以窮餓
困乏而拂亂之者其將有所俟乎時德祐二年閏月日

元

尙書論定序

王充耘

充耘嘗讀蔡氏所註尙書傳義爲之論次詳略於其間而參以管見極乎其所事總以求爲通白乃意而止無過解也昔朱子功在六經而書春秋獨無節次手筆之文春秋別有左穀公羊宋氏程胡之傳似不資於晦翁而書者暨垂沒且屬意蔡氏今之坊刻大抵皆蔡氏文也充耘所論詎云有異然擇焉而約其所中充耘自謂直可以揭晦翁不言之意而上會二帝三王所以經世傳道之心於今三十有七矣充耘粗解大致往嘗以是對策大廷蒙恩殊獎賜以勅第俾得教授鄉里而復以猥庸被蒙優詔食二千

石坐五馬年來官曠職弛愧悔交集宜無敢及於訓詁辭
章而今反翼翼然而急於是書文義之解者誠不拘官謗
之虛文忘政事之實紀略精一之聖訓迷後學之楷模也
爲論卷目如左學者試詳覽焉

明

送尹希善任海甯知州序

劉基

青田

國家憐黔首之未甯乃大選守令以熙庶績非名實素聞
於上下者弗任且以六事考覈其殿最責至重也文江尹
希善由餘杭主簿江浙行省掾史遂昌宣城縣尹溫台海
道千戶皆能其職故得舉爲海甯知州將之官相與交遊

者咸爲詩以贈之而屬其序於予予惟今之人類多喜諛
心竊非之夫求言於人而得諛不如勿求與人而進以諛
是不以賢人君子待其人不恭莫大焉故願獻其規而不
以頌今天下久安而盜賊姦宄竊發不禁何哉爲守令者
非其人耳天子有民不能徧治故託之守令故守令謂之
民牧夫牧也者受人之牛羊而牧之必爲之豐其水草適
其寢訛去其瘼蠡驅其豺狼然後物生遂而牧之道得矣
是故悍卒獨吏民虎狼也苛政橫斂民瘼蠡也虎狼不除
瘼蠡日生寢訛失時水草乏絕則亦日就死亡而已矣烏
在其爲民牧也夫好安樂而惡憂患人情同之盜賊之刑

自死而族人豈願爲之哉有大不得已然後甯蹈不測以
苟旦夕之命誠能順而撫之吾未見其弗甯也海甯爲瀕
海邑民勞而貧久矣孟子曰饑者易爲食渴者易爲飲於
今之時抑亦可以謂之易而非難矣行矣尹侯國家之寄
朋友之祝百姓之望皆於是乎在他日惠政之碑又當爲
君書也

胡氏山居八景詩序

金幼孜 新淦

距吉水之南十里許有山高出霄漢挺然奇秀曰夫容山
山之下胡氏世居焉環山四傍川原林壑遠近映帶而烟
雲風日之變態四時朝暮粲然呈露無不可賞胡氏之彥

中書舍人海澄日登覽而樂之乃掇其最勝者列爲八景
曰夫容疊翠曰墨潭澄碧曰燕岡曉日曰濠嶺寒泉曰石
井春耕曰楓林夜讀曰鍾岫晴雲曰砂山霽雪其官京師
也徵縉紳士大夫詩以詠歌之旣成帙乃謁予求爲之序
且曰昔陽山天下之窮處也一見諸韓昌黎之文而名遂
傳袁家渴遐陬之小區耳一經夫柳柳州之品題因得以
不泯地由人勝事以言傳自古然也幸不鄙而賜之予曰
嗟乎海澄之志則遠矣予言曷足取重哉且吉水爲江右
名邑八景吉水之勝處固非陽山袁家渴之比第乏昌黎
柳州之文詞爲發揮之耳雖然千載之下是地之勝又烏

知不因今日之賦詠而有聞乎此政海澄之志也予言曷足取重哉若夫其間景物之美游觀之樂則諸公賦之悉矣予特舉海澄志之所在者書以弁其端云

遼王賜長史李居正南歸序

長史古之相國今之重職爲所司之綱領也諒非才德兼備老成君子未易其選顧自郡郎冊封遼王進纘國祚恐弗克祇承思得賢長史相與輔導未幾右長史李居正由賢科厯中外而擢斯職每朝夕啟覲必戎冠博帶正色立庭進退有常威儀可觀及信任僚屬寬惠於下或事有過失必正救不苟順事當於理行之勇決不少怠獻可替否